

gratia exclusis penitus & exceptis; mandantes nichilominus universis Justiciariis, Servientibus & subditis nostris, quatenus dicto Preposito vel ejus Locumtenenti, in hac parte pareant efficaciter & intendant. Et ut hec omnia validissime perpetuè roborentur, hiis presentibus nostrum Sigillum duximus apponendum: nostro in ceteris, & alieno in omnibus jure salvo: Datum Parisius, mense Novembris, anno Domini millesimo cccc.° xxiiii.° & regni nostri tercio. Sic signatum Per Regem, ad relacionem Consilii. FLEURY.

HENRI VI,
à Paris,
en Novembre
1424.

(a) *Lettres de Henri VI, Roi d'Angleterre, soi-disant Roi de France, pour fixer le prix auquel auront cours en France, quelques monnoies de Flandre & de Bretagne.*

HENRI VI,
à Paris,
le 7 Décembre
1424.

HENRY, par la grace de Dieu, Roy de France & d'Angleterre, au *Prévost de Paris*, ou à son Lieutenant: salut. Pour ce que tousiours desirons la chose publique de nostre Royaume de France, estre maintenue & gardée en bonne police, tant au regard des monnoyes comme autrement; & il soit nagueres venu à la congnoissance des Gens de nostre Conseil, que soubz ombre & parmi les grans Blancs que faisons à présent faire en nos monnoies de France, qui ont cours pour dix deniers tournois la piece, plusieurs noz Officiers & autres noz subjetz receivent, mecient & employent autres monnoyes que les nostres faictes & forgées tant en *Flandres* comme en *Bretagne*: c'est assçavoir, lesdictes monnoyes de *Flandres* nommés Placques & Groz, & celles de *Bretagne* nommés grans Blancs, aux sommes pour plus hault pris que icelles monnoyes ne valent; & à cause de ce nosdits Officiers & subjetz ont esté & sont grandement deceuz en plusieurs & diverses manieres, qui est au grant préjudice & dommaige de nous, & à nostre très-grand desplaisance. Pour quoy nous voulans obvier aux inconveniens qui à cause de ce pourroient ensuir, & eschever que on ne pregne lesdictes monnoies de *Flandres* & de *Bretagne* pour plus grant pris qu'elles ne valent: par l'avis & délibération de nostre grant Conseil, & d'autres en ce congnoissans, avons ordonné & ordonnons par ces présentes, que aucuns de nosdits Officiers & subjetz de quelque estat qu'ils soient, ne pregnent ou mecient lesdictes monnoies de *Flandres*: c'est assçavoir, que trois d'icelles Placques pour 111 des grans Blancs que nous faisons faire de présent, & ung Gros & demy que pour ung desdits grans Blancs aux armes de *Bretagne*, ne soient pris ou mis de quelque personne que ce soit, que pour sept deniers parisis la piece, sur peine d'amende arbitraire à nostre volenté, & d'en estre grièvement pugnis selon l'exigence du cas. Si vous mandons, commandons, & estroitement enjoignons que ceste présente Ordonnance vous faictes tantost crier & publier solennellement par tous les lieux notables à faire criz en nostre ville & viconté de *Paris*, si bien & si diligemment que personne à qui il puist toucher ne le puisse ou doye ignorer, & icelle entretenir & garder sans enfreindre, & punissez les délinquans & faisans le contraire, si & par telle maniere que ce soit exemple à tous aultres. *Donné à Paris, le VII. jour de Décembre, l'an de grace mil cccc xxiiii, & de notre regne le III. Ainsi signé: Par le Roy, à la relation du grant Conseil tenu par Monsieur le Régent de France, Duc de Bethfort. L. CALOT.*

Au dos desquelles Lettres estoit escript ce qui s'ensuit: Publiées en jugement ou Chastelet de Paris, le Samedy IX. jour de Décembre, l'an mil cccc xxiv, & signé J. DOUBZSIRE.

NOTE.

(a) *MS. de la Bibliothèque du Roi, N.° 2421 fol. 80, v.°*

Avant ces Lettres, il y a: Que la monnoye de Flandres, nommée Placques, ne soit prise que 111 pour 1111 grans Blancs, & ung Gros & demy pour ung gran Blanc, & que les grans Blancs de Bretagne, ne soient pris que pour sept deniers parisis pièce.

